



1913-yil aprel oyidan chiqqan boshlagan

Fidoyilik –
Vatanga xizmat demak!

2023-yil 1-sentabr, juma,
104 (23.825)-son

Har qanday muammoning yechimi ham, ertangi kunimizni hal qiluvchi omil ham, shubhasiz, ta'limdir.

Shavkat
MIRZIYOYEV.

Zarafshon



www.zarnews.uz



https://www.facebook.com/zarnews.uz



@zarnews_uz



https://twitter.com/zarnews_uz

O'ZBEKISTON RESPUBLIKASI PREZIDENTI SHAVKAT MIRZIYOYEVNING O'ZBEKISTON RESPUBLIKASI DAVLAT MUSTAQILLIGINING O'TTIZ IKKI YILLIGIGA BAG'ISHLANGAN TANTANALI MAROSIMDAGI NUTQI

Assalomu alaykum, qadrli vatandoshlar!

Muhtaram otaxon va onaxonlar!
Yurtimiz kelajagi bo'lgan yoshlar!
Hurmatli mehmonlar!

Bundan roppa-rosa o'ttiz ikki yil muqaddam O'zbekiston o'z mustaqilligini e'lon qildi. O'tgan davrda biz qancha sinovlarni boshimizdan o'tkazdik, ko'plab qiyinchilik va mash-aqqatlarni birgalikda yengdik.

O'ttiz ikki yil avval tug'ilgan go'dak bugun o'zining mustaqil fikri, dunyo-qarashi, orzu-istaklari va maqsadlariga ega shaxs sifatida voyaga yetdi. Xuddi shu singari, bugungi O'zbekiston ham, o'tgan davrda turli sinovlarda toblanib, tajriba orttirib, o'zining aniq maqsadi va yo'li, pozitsiyasiga ega bo'lgan katta davlat sifatida shakllandi.

Bu – butun xalqimizning tarixiy yutug'i. Unda har biringizning munosib hissangiz bor!

Siz, azizlarning Vatanga mehr va sadoqat bilan qilyotgan har kunlik mehnatingiz O'zbekiston mustaqilligini yanada mustahkamlashga xizmat qilmoqda. Shu ma'noda, Istiqlol bayrami – barchamizning bayramimiz, mustaqil O'zbekiston – barchamizning faxrimiz, iftixorimiz, desak, ayni haqiqatni aytgan bo'lamiz.

Mana shu shukuhli damlarda har qanday sharoitda ham o'z kasbiga sodiq qolib, yosh avlodimizga ilm-fan asoslarini o'rgatib kelayotgan hurmatli muallim va murabbiylarni, xalq salomatligi yo'lida o'zini ayamasdan xizmat qilayotgan jonkuyar shifokorlarni, el-yurt dasturxonini yanada to'kin qilish uchun dalalarimizda fidokorona mehnat qilayotgan mirishkor dehqon va fermerlarimizni, ona yurtimiz qal-qonlari bo'lgan jasur harbiylarimizni, iqtisodiyotimiz rivojini, xalqimiz farovonligini oshirish yo'lida jonbozlik ko'rsatayotgan tadbirkorlarimizni, o'zining dastlabki yutuqlari bilan barchamizni xursand qilayotgan azmu shijoatli yoshlarimizni, qalb to'la mehri, ulug' fazilatlar bilan xonadonlarimiz ustuni bo'lib kelayotgan hurmatli opa-singillarimizni, har bir ishda duogo'y bo'lib, bizga Yaratgandan kuch va madad tilab turgan muhtaram otaxon va onaxonlarimizni, dunyoning qaysi o'lkasida bo'lsa ham, O'zbekiston sog'inchi bilan yashayotgan aziz vatandoshlarimizni, bir so'z bilan aytganda, 36 millionli butun xalqimizni bugungi ulug' bayram bilan chin qalbidan samimiy tabriklayman.

Istiqlol ayyomi barchamizga muborak bo'lsin!

Qadrli do'stlar!

Albatta, O'zbekiston o'z suvereniteti, davlat mustaqilligiga osonlik bilan erishgani yo'q. Bu yo'lida ajdodlarimizning siyosiy va ma'rifiy intilishlari so'nggi bir yarim asr davomida deyarli to'xtamadi. Hurriyat uchun kurashgan ko'plab Vatandoshlarimiz qatag'on etildi, istiqloлга intilgan millat qahramonlari zulm va zo'rovonlik qurboni bo'ldi.

Biz yurt ozodligi yo'lida kurashgan, nohaq ayblanib, bu dunyodan armon bilan ketgan vatandoshlarimizning pok nomlarini tiklashni o'z oldimizga maqsad qilib qo'ygan edik. So'nggi uch yilda ularning 856 nafari Oliy sud tomonidan oqlandi. Biz bunday ezgu

ishlarni albatta davom ettiramiz. Zero, bu masalada adolat qaror topishi shart.

O'tmishga nazar tashlar ekanimiz, achchiq bir haqiqatni tan olishga majburmiz: "o'zbek" deganda, faqat ertayu kech paxta dalasida mehnat qiladigan zahmatkash insonlar tasavvur qilinardi. Afsuski, shu darajaga tushib qolgan edik.

Paxta hukmronligi o'zbekning peshonasiga yozilgan balo bo'ldi. Paxta siyosati Orolni quritdi, ekologiyamizni inqirozga olib keldi, iqtisodiyotimizni, ta'lim tizimini izdan chiqardi. Oqibatda bir necha avlod chalasavot bo'lib voyaga yetdi. Biz buning asoratlari bilan haligacha kurashyapmiz.

Bugun paxtachilikda bozor iqtisodiyoti tamoyillari joriy etilib, soha o'z egasini topdi. Natijada o'qituvchi maktabga, shifokor shifoxonaga qaytdi, tadbirkorlar paxta "o'lponi"dan ozod bo'ldi, majburiy va bolalar mehnatiga chek qo'yildi. O'zbekiston xalqaro "qora ro'yxatlar"dan chiqarildi.

Barchamizning fidokorona mehnatimiz, g'ayratu shijoatimiz bilan Yangi O'zbekiston orzusi real haqiqatga aylanmoqda. Xalqaro maydonda Vatanimizga nisbatan hurmat va e'tibor tobora ortib bormoqda.

Prezident sifatida dastlabki ishlarimdan biri qo'shni mamlakatlar bilan do'stona munosabatlarni o'rnatish bo'ldi. Yillar davomida yechimini kutayotgan muammolar hal etildi. Buning natijasida Markaziy Osiyo davlatlari bilan barcha sohalaridagi aloqalarimiz yangi bosqichga chiqdi.

Qadrli yurtdoshlar!

Siyosiy mustaqillik zaminida eng avvalo iqtisodiy mustaqillik yotishi hech kimga sir emas. Oxirgi yillarda amalga oshirgan ishlarimiz, erishgan natijalarimiz bu yo'lida mustahkam poydevor bo'lib xizmat qilmoqda. So'nggi 6 yilda yurtimizda yalpi ichki mahsulot hajmi 1,5 martadan ziyod, tadbirkorlik subyektlari soni 2 karra ko'paygani, sanoatdagi o'sish 40 foizdan oshgani bilan yaqqol tasdiqlaydi. Qisqa muddatda kambag'allikni 2 barobardan ziyod qisqartirishga erishdik.

Lekin biz bugun bilan kechagi kunni emas, bugun bilan ertangi kunni taqqoslashimiz, ishimizni shu asosda tashkil etishimiz kerak. Chunki, kelajak bugun biz tashlayotgan qadamlardan boshlanadi.

Aziz do'stlar!

Biz mutafakkir zotlarning: "Davlatning vazifasi insonlarni baxtli-saodatli qilishdir. Bu maqsadga esa ilm va yaxshi axloq yordamida erishiladi", degan hikmatli so'zlarini o'zimiz uchun dastur deb bilamiz.

Ma'lumki, biz bir yil avval taraqqiyotimizning 5 ta asosiy yo'nalishini belgilab olgan edik. Unda ta'lim sohasini rivojlantirish birinchi galdagi ustuvor vazifa sifatida qayd etilgan.

Men doimo ta'lim, ta'lim, muallim, muallim, deb ta'kidlashim bejiz emas. Chunki ta'limni rivojlantirmasdan turib yuksak taraqqiyotga erisha olmaymiz. Har qanday muammoning yechimi ham, ertangi kunimizni hal qiluvchi omil ham, shubhasiz, ta'limdir.

(Davomi 2-sahifada) >>>



"YANGI O'ZBEKISTON" BOG'IDA BAYRAM SHUKUHI

Qorasuv massivida bunyod etilgan "Yangi O'zbekiston" bog'i kecha erta tongdan samarqandliklar va shahar mehmonlari bilan gavjum bo'ldi. Bu yerda mamlakatimiz mustaqilligining 32 yilligi munosabati bilan tadbirlar tashkil etildi.

Davlatimiz rahbari tashabbusi bilan hududlarda "Yangi O'zbekiston" bog'lari barpo etilmoqda. Eng ulug', eng aziz bayram arafasida o'z faoliyatini boshlagan mazkur bog' Qoradaryo bo'yida joylashganligi bilan boshqalaridan ajralib turadi. 50 gektarlik bog'ning 22 gektar maydonida "Yashil makon" umummilliy loyihasi doirasida 9 ming tupdan ortiq manzarali va butasimon daraxt ko'chatlari o'tqazilgan. Hududdagi daraxt, gul va maysalar purlash va tomchilatish tizimi orqali sug'orilmoqda.

Bog'da tashkil etilgan "Yangi hayot uchun, yangi O'zbekiston uchun!" shiori ostidagi bayram tadbirlari doirasida yoshlar sayli, oziq-ovqat mahsulotlari yarmarkasi, hunarmandlar tomonidan tayyorlangan qo'l mehnati mahsulotlari ko'rgazmalari, sport o'yinlari, ko'rik-tanlov va musobaqalar o'tkazildi.

Rango-rang chiroqlar yog'dusidagi bog' kechki payt yanada chiroy ochdi. Bayram ruhiga mos bezatilgan sahnada badiiy dastur namoyish etildi. Dastlab viloyat hokimi Erkinjon Turdimov yig'ilganlarni bayram bilan qutladi.

- Bu yilgi bayramning asosiy mohiyati inson qadr-qimmatini ulug'lashdir, - dedi viloyat hokimi. - Biz Mustaqillik bayramini nishonlab turgan joy - "Yangi O'zbekiston" bog'i ham aynan shu maqsadda bunyod etildi. Ko'pchilik Qorasuv massivini joylashgan hudud bundan 4-5 yil avval qanday holatda bo'lganini yaxshi eslashadi. Bugun bu maskan ko'rkam shaharchaga aylandi va hududda bunyodkorlik, obodonlashtirish ishlari to'xtagani yo'q. Bu yerdan daryo bo'yab 9,5 kilometr masofada qirg'oqbo'yi yo'llari ochiladi. Daraxtzor, gulzorlar barpo etiladi. Xizmat ko'rsatish shoxobchalari ish boshlaydi. Bir so'z bilan aytganda, Qorasuv shaharchasi kengayishda davom etadi.

Taniqli san'atkorlar va folklor ansambllarining chiqishlari ishtirokchilarga bayramona kayfiyat bag'ishladi. Tadbir so'ngida mushaklar otilib, odamlarga zavq ulashdi.

To'lqin SIDDIQOV,
Husan ELTOYEV (surat).

Maktabgacha va maktab ta'limi vazirligi tomonidan 2023-2024-o'quv yili boshlanishi munosabati bilan maktabgacha ta'lim tashkilotlarida "Salom, bog'cha", maktablarda "Birinchi qo'ng'iroq", "Mustaqillik darsi" tadbirlarini o'tkazish bo'yicha tavsiya hamda namunaviy ssenariy ishlab chiqildi.

88 MING NAFAR BOLA 1-SINFGA BORADI

Xususan, joriy yilning 4-5-sentabr kunlari maktabgacha ta'lim tashkilotlarida "O'zbekiston - mening Vatanim" mavzusida ochiq mashg'ulotlar tashkil etiladi.

Umumiy o'rta ta'lim maktablari 4-sentabr kuni soat 8:00 da "Birinchi qo'ng'iroq" tadbirlari "Yangi hayot uchun, Yangi O'zbekiston uchun" shiori ostida o'tkaziladi.

Viloyatda 1262 ta umumta'lim maktabi, 36 ta nodavlat ta'lim muassasasi, 1 ta boshqa vazirlik tasarrufidagi maktab mavjud. Yangi o'quv yilida ushbu maktablarning 1-sinfga 88 ming 533 nafar o'quvchi qabul qilinishi ko'zda tutilgan. Ayni kungacha 81 ming 926 nafar bola maktablarning boshlang'ich sinflariga qabul qilingan. Bugungacha adm.maktab.uz platformasi orqali ro'yxatdan o'tgan 1-sinf o'quvchilariga "Prezident sovg'alari" to'liq yetkazib berildi. Jarayonlar davom etmoqda.

Prezident tashrifidan so'ng

Sektor rahbarlari aholiga axborot berdi

Prezidentimiz Shavkat Mirziyoyev shu yilning 24-avgust kuni viloyatimizga tashrifi chog'ida hududni ijtimoiy-iqtisodiy rivojlantirish hamda yil yakuniga qadar amalga oshirilishi lozim bo'lgan asosiy vazifalar bo'yicha yig'ilish o'tkazdi. Yig'ilishda viloyat rahbarlari, tuman va shaharlar hokimlari islohotlarning joylardagi ijrosi hamda istiqboldagi rejalar haqida axborot berdi.



Davlatimiz rahbari sektor boshliqlariga bu axborotlarni o'z hududidagi aholiga ham yetkazish, ularning taklif va tashabbuslarini eshitish vazifasini qo'ygandi.

Ushbu topshiriq ijrosini ta'minlash maqsadida shu kunlarda viloyatning barcha tuman va shaharlarida sektor rahbarlari o'z hududida joriy yilda amalga oshirilayotgan loyihalar va kelgusi yilga mo'ljallangan rejalarda haqida axborot bermoqda.


Jumladan, Samarqand shahar hokimi, birinchi sektor rahbari Fazliddin Umarov sektor hududida aholi bandligini ta'minlash va kambag'allikni qisqartirish bo'yicha aholiga ma'lumot berdi.

- Bugungi kunda sektor hududidagi 44 ta mahallada 31 mingta oila bo'lib, ularning 2,1 mingtasi kam daromadli hisoblanadi, - dedi F.Umarov. -Ya'ni, kambag'allik darajasi 6,8 foizni tashkil etadi. Yil yakuniga qadar bu ko'rsatkichni 3,9 foizga tushirish rejalashtirilgan. Buning uchun avvalo, aholini daromadli mehnat bilan bandligini ta'minlash kerak. Mazkur yo'nalishta mahalladagi "beshlik"ning hissasi katta bo'lmoqda. Ular uyma-uy yurib, aholining ishga joylashish, tadbirkorlikni boshlash, kasb-hunarga o'qish kabi xohish-istaklarini aniqlab, shu asosida ishlarini tashkil etyapti. Bugungi kunda sektorda ishsizlar soni 1 ming nafarni tashkil etib, ishsizlik darajasi 8,5 foizdan 1,9 foizga tushirildi. Hozir ishsizlarning manzilli ro'yxati, kasbi, mutaxassisligi, yoshi va istaklari bo'yicha ma'lumotlar shakllantirildi. Shuningdek, yil yakuniga qadar yana 1,4 ming nafar migrant qaytishi kutilmoqda.

Birinchi sektorning asosiy drayveri hisoblangan xizmat ko'rsatishni rivojlantirish maqsadida yil yakunigacha qiymati 1,4 milliard so'mlik 120 ta yangi xizmat ko'rsatish loyihasi tashkil qilinadi va 750 ta ish o'rni yaratiladi. Yangi qurilayotgan ko'p qavatli uy-joylarning yer osti maydoni hamda birinchi qavatida 25 ta savdo va xizmat ko'rsatish ob'ektlari ishga tushirilib, 120 ta doimiy ish o'rni, qo'shimcha 2,5 milliard so'm xizmat ko'rsatish hajmi yaratiladi.

Uchrashuv davomida shahar hokimi aholini qiziqirgan savollarga javob berdi.

SAMARQAND VILOYATI AVTOMOBIL YO'LLARI BOSH BOSHQARMASI VA NUROBOD TUMANI YO'LLARDAN FOYDALANISH KORXONASI



yo'l sohasida faoliyat olib
borayotgan barcha kasbdoshlarini

**MUSTAQILLIGIMIZNING
32 YILLIGI**
bilan qutlaydi.

HUDUDGAZ SAMARQAND

HGT

GAZ TA'MINOTI FILIALI

barcha yurtdoshlarimizni
eng ulug', eng aziz bayram –

MUSTAQILLIK KUNI

bilan tabriklaydi.



O'ZBEKISTON SOG'LIQNI SAQLASH XODIMLARI KASABA UYUSHMASI SAMARQAND VILOYAT KENGASHI

viloyatimiz ahli va
mehmonlarini istiqlolimizning

32 YILLIGI

bilan muborakbod etadi.



Agrobank

SAMARQAND VILOYATI BOSHQARMASI JAMOASI

hamyurtlarimiz va mijozlarini

istiqlolimizning

32 YILLIGI

bilan qutlaydi.



